



Statuts dal consorti da scoula dals cumüns da Ramosch e Tschlin

I. DISPOSIZIUNS GENERALAS

Art. 1 Nom

Cul nom „Consorti da scoula Ramosch-Tschlin“ (in seguit nomnà be consorti) exista ün'associaziun da cumüns da dret public i'l sen da la ledscha da cumüns dal chantun Grischun.

Art. 2 Mera

Il consorti maina las scoulinas, las scoulas primaras, la scoula secundara e reala dals duos cumüns tenor la legislaziun da scoula.

Art. 3 Lös da scoula

Il lös da scoulinas e da scoula vegnan fixats dal cussagl da scoula in resguardand la relaziun dal numer da scolars e l'infrastructura i'ls singuls cumüns.

Art. 4 Sez

Sez dal consorti es il lö da l'administraziun.

Art. 5 Fuorma feminina

La fuorma masculina per personas e funcziuns vala eir pel sex feminin.

II. ORGANISAZIUN

A. IN GENERAL

Art. 6 Organs

Ils organs dal consorzi sun:

- a) la radunanza dal consorzi
- b) il cussagl da scoula
- c) la cumischiun da revisiun

Art. 7 Elegibilità

Sco commembers dal cussagl da scoula e da la cumischiun da revisiun pon gnir elets votants dals cumüns consorzials a basa da las prescripziuns cumünalas.

Art. 8 Incompatibilità

Commembers dal cussagl da scoula nu pon esser a listess temp commembers da la cumischiun da revisiun dal consorzi.

Impiegats dal consorzi nu pon esser commembers dal cussagl da scoula o da la cumischiun da revisiun dal consorzi.

B. Ils singuls organs

a) La radunanza dal consorzi

Art. 9 Cumpetenzas

La radunanza dal consorzi es l'organ superiur dal consorzi.

Ella ha impustüt las seguaintas cumpetenzas:

- a) da relaschar e müdar ils statuts, l'uorden da scoula e l'uorden disciplinar dal consorzi
- b) d'approvar il rapport, il preventiv e'l rendaquint annual
- c) d'acconsentir ad expensas e spaisas chi nu sun previssas i'l preventiv e chi surpassan las cumpetenzas finanzialas dal cussagl da scoula dal consorzi

Art. 10 Votaziuns

Las radunanzas vegnan manadas dal president dal cussagl da scoula dal consorzi.

Art. 11 Iniziativa

Cun ün'iniziativa pon obain

- a) il cussagl cumünal da minchün dals cumüns consorzials, obain
- b) votants dals singuls cumüns consorzials, confuorm a las disposiziuns costituziunalas da lur cumün, inoltrar propostas generalas o sböz elavurats.

La proposta d'iniziativa ha da gnir inoltrada al cussagl da scoula dal consorzi.

b) Il cussagl da scoula

Art. 12 Cumposiziun

Il cussagl da scoula as cumpuona dals delegats elets dals cumüns consorzials.

Mincha cumün ha il dret d'esser rapreschantà i'l cussagl da scoula cun trais commembers effectivs.

Il cussagl da scoula as constituischa svesa.

Art. 13 Dovairs e cumpetenzas

Il cussagl da scoula es l'organ executiv dal consorzi.

El ha tuot las cumpetenzas chi nu sun resalvadas o attribuidas tenor ledscha o statuts ad ün oter organ dal consorzi, e pissera cha la legislaziun da scoula vegna applichada.

Ad el suprastà - dasper las lezchas circumscriittas aint il art. 41 da la ledscha da scoula - impustüt il seguaint:

- a) da tscherner, reeleger e licenzchar ils magisters, sco eir d'impiegar substituts ed agüdants per l'instrucziun
- b) da planisar ils lös da scoula e las plazzas da magisters confuorm a las prescripziuns in regard al nomer da scolars
- c) da fixar ils pensums dals magisters
- d) da fixar il pensum e'ls dovairs dal manader da scoula
- e) da reglar las cundiziuns d'ingaschamaint dal persunal e las sgüranzas pel persunal e pels scolars
- f) da tscherner il chaschier e fixar la bunifcaziun a quel; l'uffizi da chaschier po eir gnir surdat ad üna da las administraziuns cumünalas
- g) d'administrar la facultà dal consorzi, da stabilir il preventiv e'l rendaquint annual
- h) da rapportar annualmaing a la radunanza dal consorzi davart sia actività
- i) da preparar l'uorden da scoula e da disciplina o eir müdamaints da quels a man da la radunanza dal consorzi
- j) da pisserar cha'ls indrizs e'ls mezs d'instrucziun sajan avant man ed in uorden
- k) d'approvar l'urari da scoula sco eir ils arrandschamaints da scoula e da sport sün proposta dals magisters

- l) da decider davart expensas na büdschettadas fin a l'import da frs. 5'000.--, resp. 500.-- per talas chi's repetan annualmaing
- m) da fixar l'import e'l termin da pajamaint da las contribuziuns cumünalas als cuosts da scoula
- n) dad organisar e surdar il transport dals scolars; schi fa dabsögn dad organisar il gientar pels scolars e da pisserar chi sajan chürats sur mezdi
- o) da fixar l'indemisaziun dal president dal cussagl da scoula
- p) d'organisar annualmaing üna radunanza d'orientaziun dal consorzi
- q) da rapreschentar il consorzi vers l'extern
- r) da fixar il plan da scoula e da vacanzas
- s) da decider davart las tradiziuns ed üsanzas da scoula tenor cumüns e fracziuns

ulteriuras incumbenzas e cumpetenzas dal cussagl da scoula dal consorzi vegnan stabilidas i'l uorden da scoula dal consorzi.

Art. 14 Sezzüdas

Il cussagl da scoula as raduna sün invid dal president, e quai uschè suvent sco chi'd es necessari tenor las tractandas. Duos commembers pon pretender pro'l president la convocaziun d'üna sezzüda.

Sün invid special piglian ils magisters o il rapreschentant dals magisters part a la sezzüda dal cussagl da scoula cun vusch consultativa.

Art. 15 Protocol

Davart las trattativas dal cussagl da scoula vain manà ün protocol chi ha da gnir approvà illa sezzüda seguainta.

Art. 16 Cumpetenzza da decider

Il cussagl da scoula es cumpetent da decider, sch'almain quatter commembers sun preschaints.

Art. 17 Decisiuns

Per tuot las decisiuns dal cussagl da scoula vala la majorità da las vuschs. Mincha commember es in dovair da vuschar cun resalva da las prescripziuns davart l'oblig da tour s-chüsa. In cas da parità da vuschs ha il president da dar la vusch da tagl.

Art. 18 Suottascripziun

Il president insembel cun ün oter commember dal cussagl o cul secretariat suottascrivan valabelmaing pel consorzi.

Art. 19 Indemisaziun

Ils commembers dal cussagl da scoula sco eir ils revisurs da quint vegnan indemnisats e bunifichats dal consorzi per lur lavur e per lur spaisas.

c) **La cumischiun da revisiun**

Art. 20 Cumposiziun

La cumischiun da revisiun as cumpuona dals delegats elets dals singuls cumüns consorzials.

Mincha cumün ha il dret d'esser rapreschantà illa cumischiun da revisiun cun ün commember.

La cumischiun da revisiun as constituischa svesa.

Art. 21 Dovairs e cumpetenzas

La cumischiun da revisiun ha da controllar ils quints e l'intera gestiun dal consorzi.

L'incumbenza da reveder la contabilità dal consorzi po eir gnir surdatta ad üna terza persuna, nomnadamaing ad ün büro fiduziari.

Davart il resultat da sia examinaziun e da l'eventuala controlla fatta da terzas persunas dà la cumischiun da revisiun annualmaing ün rapport in scrit cun propostas a man dal cussagl da scoula e da la radunanza dal consorzi.

III. FINANZAS

Art. 22 On da gestiun

L'on da gestiun correspuonda a l'on da scoula.

Art. 23 Cuosts d'exercizi

Sco cuosts d'exercizi valan:

- a) ils salaris dals magisters
- b) ils fits per las localitats da scoula tenor contrats da fittanza cumprais il s-chodamaint ed il nettiar
- c) las expensas per material da scoula e d'instrucziun inclus l'inventar
- d) ils cuosts da sgüranzas pel personal da scoula e pels scolars
- e) las expensas pels transports e pels giantars dals scolars
- f) las expensas per l'administraziun da la scoula (chascha, organs, spaisas, etc.)
- g) otras spaisas chi stan in connex culs affars da scoula.

Art. 24 Scumpart dals cuosts

Ils cuosts da gestiun e d'administraziun vegnan scumpartits süls cumüns davo avair redüt las contribuziuns chantunalas sco segua:

- a) 40% dals cuosts a basa dal numer da scolars
- b) 60% dals cuosts a basa dal numer d'abitants

Decisiv es il numer da scolars als 1. schner da l'on scolastic currant e dals abitants tenor la controlla d'abitants. Scha'ls cumüns consorzials nu fan part a l'istessa gruppa da forza finanziaria, schi vain quai

resguardà toccantamaing. Il cumün chi'd es illa megltra grupp surpiglia la differenza da las subvenziuns chantunalas.

IV. MEZS LEGALS

Art. 25 Recuors in affars da scoula

Cunter decisiuns e disposiziuns dal cussagl da scoula in affars da scoula po la persuna directamaing pertocca recuorrer infra 14 dis daspö la comunicaziun al departamaint d'educaziun chantunal, scha la ledscha nu dispuona otramaing.

Art. 26 Recuors in affars consorzials

Cunter decisiuns e disposiziuns dal cussagl da scoula chi nu concernan fatschendas scolasticas po mincha cussagl cumünal e mincha persuna directamaing pertocca recuorrer infra 20 dis daspö la comunicaziun al tribunal administrativ chantunal.

Art. 27 Plant

Per cuntaisas da dret public ed administrativ tanter il consorzi e singuls cumüns consorzials valan las prescripziuns correspondentas davart la procedura da plant tenor la ledscha davart la giurisdicziun administrativa.

V. DISPOSIZIUNS FINALAS

Art. 28 Revisiun

Üna revisiun totala o parziala da quists statuts po gnir fatta da tuots temps sün proposta dal cussagl da scoula, dal cussagl cumünal d'ün cumün o a basa d'üna iniziativa o moziun fatta in ün cumün tenor il dret cumünal.

Art. 29 Sortida

Ils cumüns consorzials pon sortir cun argumaints motivats dal consorzi, respettand tschinch ons term da desditta.

Il cumün chi sorta nu po far ingüna pretaisa in regard a la facultà dal consorzi e nu po pretender chi vegna restitui quai ch'el ha contribui.

Art. 30 Schoglimaint

Ün schoglimaint dal consorzi po gnir decis be cull'approvaziun da tuot ils cumüns consorzials.

L'adöver da la facultà restanta o l'amortisaziun dals debits sto esser üna part integrala da la decisiun davart il schoglimaint dal consorzi.

Art. 31 Aboliziun

Ils statuts preschaints rimplazzan ils statuts d'organisaziun da l'associaziun da scoula Tschlin / Ramosch dal 1995 e'ls statuts dal consorzi da scoula Ramosch-Tschlin dals 1. mai 2001.

Art. 32 Entrada in vigur

Quists statuts aintran in vigur al mumaint ch'els vegnan acceptats da la radunanza dal consorzi e l'acceptaziun da la Regenza.

Acceptà da la radunanza dal consorzi dals 5 october 2006.

Consorzi da scoula Ramosch-Tschlin

il president:

l'actua:

Mario Molinaro

Anita Bischoff

Approvà da la Regenza dal chantun Grischun als: 28.11.2006 / 1311